

三

迷

奇

三述奇卷二

鐵嶺

張德彝在初隨筆

貴 榮竹坪校閱

庚午又十月二十一日癸未晴卯初開船巳正抵西貢
停泊同黃道崇俞惕盦駕小舟登岸步至宏泰昌號拜
張沃生少叙留饌飲安南酒甘如中土玫瑰露高引之
與薄郎亦來此沃生邀往中華城一遊恐有公務辭之
復約申刻在鋪中晚酌不獲再辭回船後聞洋人云此
地虎豹多而害人芹蔭兩岸小虎成羣故鮮有漁樵者

蓋土人性情、不知工作、遂成荒野。三年前、曾有一
名病歿、四兵持槍往葬、突來一虎、兵急棄尸、逃歸礮台。
集眾同往搏虎、至則列隊放槍、虎不知懼而進之、隊首
伏身、以劍刺其胸、虎仍奮力前撲、眾退良久、再往、則被
刺之虎已死、隊首亦驚駭而死、劍深入虎胸、力拔不出。
人與虎之獷悍為何如耶。申初、隨星使登岸、乘車往拜
法國駐此之總督達皋路協者、年逾三旬、黃髮灰鬚、文
武環坐者二十餘人、其房純以木造、極寬敞、高約五丈、
寬五丈、長約二十丈、前有戲臺、後如泰西議事廳之公

座設水法鮮花、四壁畫花卉禽鳥、二龍戲珠、皆華人筆也。上懸玻璃燈十餘對、茶酒少話即辭、先同德威理亞慶霽堂暨巴里銀商葛菲滿乘雙馬洋車、行六里許、至公花園看虎二熊、一皆大於前次所見者。一路洋樓點綴、花樹叢生、與夏秋同。是地多產檳榔、樹有高於椿楊而粗於松櫟者。去此又行三十餘里、至中華城、屋式與羊城同、有琉璃瓦房數處、曲徑盤桓、極其幽雅、係供奉關聖帝君、天后娘娘暨財神火神神像、又有義安會館。石牌上鐫海國風和四字、小河數道、舟艇鱗集、鐵木橋

梁馳驅車馬亦小邦之一繁庶區也時已薄暮左右然
假煤氣燈鐵架玻璃罩然以石油亮與煤氣無異各鋪
門首四五人對坐喧譁亦有賭者地雖名城而無垣堞
不過一村鎮而已出此則清風徐來花香觸鼻蟲聲四
應螢火如星抵岸與德葛分袂偕霽堂步至宏泰昌號
而高引之黃道崇簿郎已先至焉食間有福基號商閩
人陳祿勲者折柬來來邀因宵深辭謝飯畢稍坐回船而
東方白矣記安南人述其土語云是曰牌非曰空牌問
好曰多个我曰兌他曰埃你曰矮一曰木二曰吸三曰

四曰邦、五曰邦木、六曰搜、七曰拜、八曰大木、九曰支。
秋十曰布艾。

二十二日甲申晴寅正潮長開船卯刻日出赫赫如焚。
已初出口雖有微颼而水無紋皺午後忽狂風大作巨
浪搖船華人無一暈者而洋人嘔吐者反居八九誠不
可解之事也。少選忽由蓬頂進水凡甕皆溼後桅之橫
竿折損一根長約四丈堅如松柏竟為風浪摧折其猛
可知矣。是日午前見大魚出水長五六尺者四尾知其
風浪必作也。亥初陰。

二十三日乙酉早細雨辰正晴見大虹見于西方倒映海面忽圓忽半忽整忽雙五色迷離亦幻境也飯後有洋人訥武英者談云今日日本國學習各國文武兵法效驗極速貴國亦宜有備方可無虞即以諸公所著鞋底論之足見其蠢笨不靈矣鼻曰即以鞋底觀人其真假虛實亦可畧見一斑貴國鞋底必先薄而後厚雖厚亦只四分之一日日本鞋底前後實而中空雖實不足四分之一皆不如我國鞋底首尾一律以之待人亦必始終如一不致易轍改弦也其人不對而去是日浪大船面

見水杯盞被損者甚多。午初復雨。午正忽一鳥飛于船面。鴨爪鷗身。細啄小尾。毫不畏人。洋犬見而欲捕。乃急捉與洋僕。令護惜之。擬抵新嘉坡再為放之。

二十四日丙戌大雨。卯正因路迷度數少為停輪。已初雨止開船。左右各一山島。皆在掩映間。小大難辨。見二漁父立于海面。長皆逾丈。必漁戶設此以捕魚之脫網者。同舟有日本人橋正者。言語溫和。頗知禮義。問慶應四年。南北兩部之名。曰。所謂南部者。乃薩州候。長州候。土州候。備州候。藝州候。其餘小藩數諸侯稱之。天兵所

謂北部者。乃仙臺侯、會津侯、米澤侯、莊內侯、南部侯等。此具魁者也。問當年南北孰勝。曰：北部乞和事平。自是改慶應為明治。問此時仍官恆為官、民恆為民否。曰：敝國六百年來皆尚封建之制。四年和議以後，釐為郡縣。自是又易一景象也。又言貴國與我國同為亞細亞人，且唇齒相依，宜共為保護以固疆域。彝曰：唯其國之數目字。土語呼一曰什多子，二曰夫多子，三曰米子，四曰腰子，五曰依自子，六曰摩子，七曰那納子，八曰牙子，九曰庫庫訥子，十曰托。又曰：其斯柏子，百曰哈古，千曰層。

萬曰旺彼此筆談良久因已鳴鐘二次遂拱手而別蓋
鳴鐘以告眾客飯齊也午後西南峯巔蔚然深秀東北
野木繁蔭水色葱綠天氣稍涼未正晴申初抵新嘉坡
傍岸後有中土暹羅貧人偃偻提攜往來不絕或藤或
蓆或石或鳥或衣服或寶物咸來登舟而售酉正忽陰
大雨一陣人皆散去雨止復來入夜熱上下貨物人語
喧譁聲音聒耳終夜不息是夕復與同舟日本五人挑
燈共話一名野村尚耕一名毛利親信一名橘寄景福
一名小坂貫一一名堀江春野皆強記善談有問貴國

兵艦之數。彝對以東南海面。戰船無算。有問孔夫子之
屑若何。曰。千餘年來。已封為世襲衍聖公。實為海內師
表。有問貴國皆奉儒教否。曰。儒教如日月經天。萬古不
磨。間有奉他教者。不過億萬中之一二而已。彝問日本
所奉何教。彼云。我國有國教。而以儒教為翼。昔時愚民
崇信佛教。今皆廢之。問國教係何教門。彼曰。忠于君孝
于親。自是天下之公法。問忠孝二字。不知由何教所傳。
彼曰。皇祖皇孫。授受心傳。施之於政。載之於書。又問皇
祖皇孫。原係何教。彼曰。皇祖謂天御中主神。為我國開

聞之祖。皇孫謂其子孫相繼受統者。彝以言涉妄誕。乃書曰。夫既知忠于君。孝于親。即係儒教。貴國由君至民。所讀者。我國之四書五經也。公言國民皆知理。或然矣。不知貴國先王施之於政。載之於書。其書若何。可與庶民讀否。其人不答而退。眾皆悄然。夜半仍雨。冷氣逼人。風景清爽。涼似中秋。

二十五日丁亥。仍雨。辰正。持星使名片。下船乘車。行八九里。至前次所過之大羅布店。拜法國領事官賀爾騰。遇同船東西洋人數名。德那殷三人。晤後即回。途次見

新建樓房二所。工作頗細。各門橫一石匾。一書源興。一書宣陽會館。已正回船。又雨。行人多將橘橙與大小銅銀洋圓投之于水。有小兒數名。躍入取之。見日本人則齊呼曰日本日本。蓋望其擲錢也。午正一刻。展輪繞回。出口甚平。申正驟雨一陣。雨點觸水。跳躍不定。晚餐得食番果。名曰蠻果。似蛋。色禁如茄皮。厚四五分。澀如石榴皮。肉形如橘。味比櫻桃。色似海棠。飯後同二日本人坐談。一稱辨務使。從五位。鮫山烏藤原信年近三旬。面黃無鬚。一稱權大記。正七位。鹽田菅原篤信年約二旬。

麻面無鬚皆奉官委往英法日耳曼等國辦理交涉事
務者能英語談次篤信舉筆書七律一章與看兼求斧
政詩云欲避炎威倚玉欄渺茫萬里碧波瀾去家既覺
南來遠北斗七星低不看弄曰璧合珠聯清新俊逸絕
似唐人風韻無懈可擊其人大喜復書平素所作一云
梅香雪影鄂羅夏螢火蟲聲印度春踏遍東西萬奇景
退成天地一閒人一云百二重關鄉信賒清明過後尚
天涯春雲不鎖夢魂返一夜故山踏落花二章慷慨激
昂有舉頭天外之想日本自古多騷士廣陵散尚在人

間也是夕清風陣陣可著袷衣與前二次經過天氣迥異足見或云此地四季無分者謬矣

二十六日戊子細雨卯正晴見風蓬三隻亦皆南行者然以輪船之速比之反似退而不前辰正北行走馬夏港東有麻六甲地屬英國西則蘇門答臘大島屬荷蘭國已初見東面山岡起伏乃麻六甲之西南界也同船有荷蘭人伊阿薩者携其三子二白一黑又麥雅爾者係同治五年同船萬斛之友問及萬斛彼云仍駐扎窪現克提督又日本人建野鄉三者相與扳談彼云敝國

自古被髮左衽而近年風氣大異凡物皆仿西式比之
貴國自覺愧甚彛言大領闊袖為神洲之古裝何恥之
有即以其所有易其所無亦非無益彼云不知其所有
者何曰無非輪機火器之類耳彼云此固有益然亦有
損曰既與各國換約通商則此事自不得不學習之苟
吐棄而不屑為其禍患之來將指不勝屈焉其人聞而
感慨者良久當日申酉之間見左右小島二三近者蒼
翠遠者迷離終日水平紋如席捲其色深藍

二十七日己丑卯正大雨北行稍西過蘇門答臘之西

界雷里錫里地方長逾三百里一望平行密樹排列如
墻過此則海水藍綠相間如圖畫然辰初西晴東南南
陰北虹未幾大雨如注已正止見西面碧岡層疊長百
餘里午正復雨一陣雨止即晴晴即熱似三伏戌初過
蘇門答臘之西北界總名亞齊外二小島一名普陸一
名豪格山與雲連一望無際縹緲千仞如送如迎過此
稍西水色深藍

二十八日庚寅晴仍西行水色黑而平午後稍北逆風
船微簸揚雨初見西南烏雲大片堆累如山兩峯之間

橫有五彩一條如虹。乃日光斜射與雲混雜而成者也。又巨魚長約丈許者躍水逐船。

二十九日辛卯晴。記同船日本人多有善奕者。棋式與華同。又喜咕嚕。其聲如方外。嗩經。所攜書籍甚夥。如元寇紀畧。日本野史。以及詩草文詞。靡不舟車供覽。午後一魚飛入艙中。長約八寸。其翅即其分水。潛而能飛。足見造物之巧也。入夜天陰尤熱。微風浪湧。船即搖蕩。亥初。因輪機氣筒稍有洩氣之處。停輪二刻。修畢復開。

十一月

初一日壬辰晴。未初見同船數人。玩于船面。係一人曲身。以一手背撫臀。一人坐而蒙其頭。餘人後列成行。內一人立而擊其手。彼起以手指係何人。是則彼此互換。否則再蒙。此戲呼為滿收達。譯法言。執其手也。晚饌席間。德威理亞那威勇二人。仿華人拇戰。眾皆大笑。法人畢路安云。日本人亦有拇戰。係二人不語。對手三搖而後出。或掌或拳。或無名指與將指。以掌為紙。拳為石。指為剪。剪能剪紙而不能剪石。石能擊剪而不能擊紙。紙能包石而不能包剪。此法與中土啞拳酷似。入夜涼。

初二日癸巳晴。因昨夜錯查度數，誤過錫蘭島。自子正
回行三百餘里，午初始到。停輪後，浪雖小而船搖風雖
有而天熱。申初，隨星使駕小舟登岸，乘車入城。里許，至
英人所設之歐連大店，樓高三層，內外整潔。茶罷登車，
北遊十餘里，一路花木與前同。惟有小兒數名，追隨喧
叫。有能英語者，則呼人以乞錢；與菸捲，不能英語者，則
言巴巴，不知其仿華言抑或土語耶。亦有賣肉桂、鮮花
及金銀戒指者。酉初回店，供具頗佳，得食西瓜，味甘皮
薄，洵為解渴之冰漿也。旋有土人持寶石、貝、象牙、瑪瑙。

瑁各器紛紛來售。陸離光怪如入寶山。夜微涼。花香滿屋。清風若秋蟲鳴。四壁唧唧可聽。記此島在南印度正南。周千餘里。有崇山峻嶺。多產寶石肉桂。異獸珍禽。天時酷熱。多雨多迅雷。前明葡萄牙據立埔頭。後為荷蘭所奪。今則英人盡有其地。自古佛教興于印度。前漢東傳盛行中土。晉之法顯。唐之元奘。曾歷其地。詳載而歸。今中土招提所供菩薩羅漢諸神像。或裸上體。或舉鉢盂。或耳帶環脛束釧。衣袈裟坐蒲團。與本地廟中無異。至元時。五印度半從回教。而佛教漸微矣。百餘年來。泰

西各國先後爭有其土。則五印度之佛教。不過碩果僅存而已。世代盛衰之感。洵不虛也。

初三日甲午晴。早起見近岸三五里樓宇相望。或石或木。雖皆宏敞。半就頽圯。憶自丙寅迄今。不過數載。未加修葺。心甚異之。詢之店主云。此地當繁盛時。樓宇多係妓館。花天酒地。日夜管絃。今則風流歇絕。咸為貧者僦居。何能重事輪奐也。沿途酒肆間。有幼女當壚。挽髮跣足。而面如灰土者。雖寡市賈笑。殊覺畏人。或云。此即夜度娘。是變粉黛而為夜叉矣。土人呼一曰艾克艾。二曰

太克艾三曰杜耐四曰哈達賴五曰巴海六曰海艾七
曰哈代八曰阿代九曰那米艾十曰得海百曰艾庫賴
千曰力海喇問好曰來柏爾謝曰毛哈摩爾奚伊我曰
馬馬你曰額木巴他曰額侯或伊葉其字皆右起橫念
如我則⑤⑤你②⑤地⑤⑤一②②②②二②②②②三
②②②②四②②②②餘不及贅卯正星使委慶雲堂趕
輪船令其撥小舟來迎辰初回艙本地土人有回教者
有佛教者回教難髮佛教留髮男女多食鮮橫櫛故唇
齒色若猩紅未初開船忽附船有哀號之聲甚急詢之

知土人攜其幼女傍船賣果蔬女為輪機滾水所濺哭而呼其父奈舟行甚速瞬息已達百里女之傷否未卜心甚戚戚焉入夜涼船極穩

初四日乙未晴旁風船大搖蕩酉初稍平遇英國輪船之東行者其駛如飛是日係西曆十二月二十五日為天主之誕男女禱歌者甚眾天明始息

初五日丙申晴水平如油忽黑忽藍忽惹綠午後見同船一印度孟買人名發自馬係回教者先赴亞丁拜祖而後往居達地方者能英語問其相見之禮曰遠則彼

此以手撫頂。近則握手言。惟見其抱一男孩。極胖。重眉。環眼。著草帽。布衣。項有玳瑁念珠。并鐲釧等件。頗似女孩。問貴處婦女有染下目皮之俗。此既係男。何亦染耶。彼曰。無女故也。問其名。曰阿米亞。生甫八月。問其胖之由來。對以飼牛羊乳故。

初六日丁酉晴。晨有日。本人名山田虎吉者相見。俞惕。盒與之握手。彼曰。握手非禮也。尋曰。入境問禁。入國問俗。書有明言。今所處之地。既非中華。亦非日本。以是禮行之。似無不宜。彼無言而退。後見其所帶漢書。有五經。

四書新論征韓略等字皆清楚無訛。

初七日戊戌晴。水平如鏡。船行甚速。申初陰涼。風起欲雨。船即簸揚。酉初大雨滂沱。戌正微止。入夜晴。仍風。初八日己亥晴。船搖如昨。讀日本一書。顏曰。絕句類選評本所選皆唐宋詩。開章即賀季真回鄉偶書二首。通卷共詩數百。皆分類分代。可知同軌同文。

聖天子之教未遺於在遠也。

初九日庚子晴。狂風巨浪。客人暈而嘔吐者居半。惟一日本人年約二旬。病已四五日。鎮日不食。只飲涼水而

乙申正過阿斐里加東北之素闊多拉島。島不甚大。寂
寞荒涼。無人管轄。無人居住。或云多產寶石。記日本人
攜有新刊輿地全圖一頁。極細。係由別國圖本譯出者。
所有各處山之高低。水之闊狹。靡不詳細周備。惟難識
者。其國之平段字也。聞二年前。伊國平定後。官定通國
庶民。有能查出外邦文。理器皿一切。有強於本國者。准
其自行政易。毫無禁阻。是以同船之日本人。皆著洋服。
據云。俟到外國辦官務時。仍著伊國服色。若然。是仍不
失其本也。究未敢深信耳。

初十日辛丑晴。船仍搖蕩。水黑色。天氣涼似初秋。早餐得食一種黃豆。大於莢米。而味亦如之。法邦多產為農食。呼其名曰比斯邦。具卜瓦尺尺易。日本人呼曰安斗瑪美。寫其國平段字。則上二卜。而了又。正字則曰豌豆。又聞日本國俗。婚嫁不用媒妁。惟父母問男願娶某女為妻否。問女願嫁某男為夫否。彼此情願。乃結褵焉。晚見阿斐里加東界之高山一帶。翠微四合。削壁參天。地名蘇麻里。在赤道北十度。北京西六十九度。十一日壬寅晴。是日為西曆一千八百七十一年之元。

旦早起彼此相見皆道新喜又值彝之賤辰風平浪靜
水碧天清茶香酒美船穩人和樂甚午正遙見東面長
山一帶乃斐洲阿喇伯之西南界也地名哈大拉木西
正抵亞丁住船見西岸景況稍異於前開闢道路建造
樓房而屋宇整齊者不足十所白石碼頭只一而已又
各處惟法邦公所門首植二小樹此地山則堆疊水則
汪洋禽獸少見花木無奇

十二日癸卯晴涼申正展輪風起浪湧搖蕩異常晚餐
得食蘋果味如沙果或云來自印度記日本刑律放大

者縛于十字架上以柴焚之忤逆者縛于十字架上以槍刺之通奸者徒殺人者抵其喪服亦白色父死百日釋服母死五十日釋服貿易者可請于官減至十日餘與中華大同小異又本船船主傳瓦石因此船初次改路由華回法以便修理而紅海窄且島嶼多乃由亞丁僱一引水人酬法圓四百方令其引至蘇耳士十三日甲辰晴北行順風丑正入紅海口西面多山黃赤黑白四色乃阿斐里加之東界也地屬阿柏奚呢亞東面高山遠望迷離乃亞細亞之西界也地屬阿喇伯

辰初見東面一島不大色白形如筆架又西面山峯萬
 笏以千里鏡窺之因其映日幻成五彩已初船復搖動
 波浪洶湧未初又東西小島四五亦皆白色入夜熱
 十四日乙巳晴熱午後忽見二蝶飛入艙中色淺黃長
 約寸許不知來自何處翩翩雙舞輕盈可愛入夜風清
 水靜熱退涼生星稀雲淡皓月當空宛似中秋景也
 十五日丙午晴水平如鏡雖係隆冬而熱如盛夏因同
 船有六七日日本人早餐後與法人畢路安談次畢君極
 讚日本前進之速言十餘年來不惟國政多所更張即

民間風俗亦多改從西法。如輪船火車電線等皆已通行國中。衣飾房屋亦漸次改式矣。彛言天下各國政教咸有所本。固當不失本來面目。至火器車船等因西國多以戰爭為心。在他國自不得已而仿行之。其他似不必然。因無事更改也。夫日本諸事既效泰西。自當一律其大者不必深論。姑將至微者言之。試問日人所著衣履。究比西國如何。畢曰。按所著衣履較之西國相去遠甚。而且貽笑他人。蓋其服色于官民文武品級尚未分別也。彛聞所言笑而未答。

十六日丁未晴平申初微陰逆風船甚簸揚晚有日本
人鹽田者持溪琴山房詩稿係伊國時人紀伊菊池保
定士固所著士固者鹽田之父執也能吟咏其律詩頗
佳如五言者題有岐岨山中七首以紅葉青山水急流
為韻紅字韻詩云曾自五丁鑿遙遙一線通苔磯帶雨
綠霜樾破烟紅雲漲蒼山沒溪回石路窮行聞樵者語
山下穿寒熊葉字韻詩云關河遠跋涉秋暮山重疊客
袖薄於雲鄉情多似葉芒鞋親短策蔬食彈長鋏尚有
客魂豪行看弋者獵青字韻詩云板屋倚林垌寒泉入

小庭敲雲孤磬冷。燃夢一燈青。烏起月侵砌。風鳴葉打
桂。卧知霜威重。衾薄睡頻醒。山字韻詩云。中山百二關。
險隘老杉間。藤絡臨溪石。雲沉欲雨山。四時巖夢發。千
古岳蓮開。暮弔英雄跡。淒然淚自潛。水字韻詩云。疎鐘
萬木裡。蕭寺何處是。行見歸林雲。坐聞鳴磬水。蔓枯薯
蕷脆。葉落茱萸紫。為擲羈旅愁。欲追赤松子。急字韻詩
云。健竹青簾笠。潭明影如揖。思家曉月遙。為客年華急。
霜重野狐愁。葉零山鬼泣。總驚千里魂。只見單襟溼。流
字韻詩云。單身辭帝州。來踏信中秋。樹抱荒城古。水搖

危棧流家書封暗淚燈火照青愁為問故園月寒衣已寄不

十七日戊申晴熱逆風早見東西諸山連綿絡繹色皆黃白東為阿來比亞西為努北阿皆埃及國之邊界也蓋一因乙入黃道更因將出紅海故度數既與蘇浙同而天氣亦覺無異晚見洋人一種玩物法名貝拉柏凱係一皮條長約二尺兩端各置一木球大如橙一端連一木棒長約半尺擅此技者一擲一轉自將球插棒頭有日本童僕年甫十四歲善擲是球日本武生告之曰

若能擲十而得八，必踞而叩首。乙而果然而與之賭者，若崩厥角矣。又日本人管原篤信，強令彝一揮毫，並乞一拈韻。彝辭以船搖心亂，伊仍曉曉不已。乃磨墨伸紙，草錄唐詩二首，又口占四韻云：四海皆兄弟，瀛寰五大洲。遨遊輿地外，數載弗能周。幸遇鄰邦士，乘風溯上流。挑燈衷曲訴，詩酒足千秋。當日因將至蘇耳士，多有下船而他往者。于是本船總管茹良英人賴安索中國紙扇，以便奉揚。法國婦人戴都奴與杜彩鵲索女工鍼黹，以作表記。彝乃一一與之，眾皆喜謝。酉正，見東山頂月。

木

出少半。俞惕盒乃舉酒而邀之。移時光圓如鏡。彩徹雲
衢。而西山後日落餘輝。上映如火。噴吐少刻。矇影限盡。
而光滅矣。海面不寬如中土鄱陽湖。左右小山羅列。惜
無花木。皆突兀。几不毛耳。亥正一刻。抵蘇耳士。住船下貨。
有法人單安者。性嗜麴蘖。自言恨無華友。代購瓊漿。弄
乃商諸惕盒。乞高粱一杯而與之。其人喜云。較之故國。
直因酒。避此多矣。其色同。其味甘。其力柔。

十八日巳酉晴。此地排列風蓬火輪各舟。多於前三次。
經過所見者。所識輪船有埃及七隻。英法數隻。內有英

國雙礮臺鐵甲輪船一隻不甚高長三十餘丈寬逾三丈鐵厚四尺雄壯可觀本船原欲早開因有英國兵船攔淺當路午後始移申初開船北行入法國新開之蘇耳士河口係同治三年法國輪機使者賴賽樸設法開鑿者時閱六載共用洋圓萬萬合銀七千二百萬兩長三百里寬六丈深二丈四五尺南口在蘇耳士稍東仍名蘇耳士北口在阿來三完呀之東地名波賽此地原為亞細亞阿斐里加二洲之連脰今竟瓜分為二神工鬼斧人定勝天古之愚公移山不過徒傳虛語也入口

見左右堆土高皆逾丈。此外地皆沙漠，無房舍，行八里許，遇英國輪船名教蘭兜者，長二十餘丈，寬二丈許，通身綠色。其上男女行人甚夥，彼此眺望，有相識者，皆免冠搖巾對呼名姓。又數里，忽見一坑，只鋪乾草一堆而已。共行六十餘里，戌正，至薩哈哈地方，恐夜行遇險，因而停泊。遙見西岸酒肆木房二三間，一帘在望，而甕頭之香已習習而來矣。晚餐後，駕小舟往看船右輪機，挖泥船船長四丈一尺，寬五丈，首尾如船，中空立鐵架如橋，前後鐵練數根，以輪機轉斗三十二箇，每箇鐵造長

約三尺，周逾四尺，底有孔，上下環行，取泥澄水，上若滿而下自空，泥皆歸入船旁木舟，舟滿傍岸聚泥成堆，每一小時汰泥萬斗，一日可掘地周數丈，深二十四尺，誠挽河之良具，以之掃沙，自無淤積之患焉。

十九日庚戌晴卯正開船，去此漸寬，後則兩岸高低曲折，或遠或近，間或渺茫，名曰鹽湖，是湖自開河後始有水，沿路遇小船六七，復入新河，行十餘里，入小湖，地名賽喇彬，始見青草數堆，惹龍可愛，午正抵義思麥利呀，住船，即時束裝，改乘小輪船，行三里許登岸，策蹇行一

里過木橋入葩釀店樓高二層亦頗整潔主人係法國婦人名巴曩者晚見五孩戲于樓前一人手舉扁鼓以指敲之無節奏只聞丁東之聲而已四人互相跳舞忽躍立于頭之上忽偃卧于足之下如戲猴然殊有趣此地多沙漠鮮田疇人烟稀少亦一寂寞鄉也由蘇耳士至義思麥利呀計水程一百七十里有奇

二十日辛亥晴早隨星使乘馬車北行三里許至法國激水廠因波賽無甘泉故每日由此以輪機鐵筒激去二百萬瓶每一萬六千瓶值銀一兩此廠已設三年大

獲厚利。廠主名皮爾者，引入機房，一大鐵輪，周約八丈，旋轉極速，出此，則前後花園，引水開渠，所植茨菇、蓮花，其種來自中土，橘、橙、葡萄，每架可結二百數十觔。花有一品紅、仙人掌、旱金蓮、僧冠帽、黃紫佛茄、紅粉繡球、大麻子、霸王鏢等類。疏有蓼菜、波菜、白菜、蘿蔔等類。畦隴交通，芬芳襲鼻。去此，復行六七里，至新河畔，觀法后行宮，規模不大，亦無樓閣，高約二丈，石座木身，內外糊紙，圖畫五彩，內分一大間、六小間，鋪陳華美，四壁生輝。有土人四名看守。據云：前二年，新河告成之時，法后來此。

賞覽。宮外四面無樹無花。殊少點綴。回而南行。見有新
建本地總管公署。樓房高大壯麗。可觀。再南入一長街。
東西市廛對列。多係西人開設者。房皆無樓。頗鄙陋。惟
一鋪門首懸中國一畫。所繪華官紅頂大翎。貌似粵人。
頗生動。後入一小花園。環垣繞以花木。中有鐵架水法。
木甃行行。係為遊人休息之所。少坐即歸。早餐已初登
火輪車。北行稍西。至祿泉集地方。午酌。地近埃京開路。
微覺繁華。過此則田疇交錯。樹林陰翳。竹籬茅舍。繞屋
扶疎。多有松柏楊柳。棉麥菜蔬。沿河一帶。荷葉菖蒲。清

氣撲人眉宇。後過乃勒江鐵橋二三座。至北衲爾地方。
易車因地係通衢。少待片時。即開行矣。戌正抵阿來三
完呀海口。改乘馬車行五六里。至豪泰德安代街。入法
人開設之英邦大店樓三層。頗華美。前臨街市。後傍海
邊。上置花石水法。登樓看海。一望無際。潮浪之聲。晝夜
不息。由義思麥利呀至阿來三完呀計陸程五百一十
里。入夜微陰涼。

二十一日壬子晴午。正有法邦總領事博洛呢葉來拜。
其人曾到上洋。約于戌刻在彼晚酌。去後。彝同俞惕盦

街遊樓房閭巷稠密曲折。城市開熱如中土。房舍形式似泰西。路途平坦。鋪多洋人開設。所售者本地回錦絨。壇穀有粳米麥麴高粱黃米黑黃豆等類。蔬有白菜菠菜豌豆蕎麥香菜大蘿蔔胡蘿蔔扁豆黃瓜茄子蕃椒葱蒜韭芽無花果山藥豆等類。果有蘋果梨杏葡萄甘蔗西瓜榧子榛子栗子石榴核桃橘桃李柰等類。牲畜有牛羊雞鴨魚蟹等類。間有豬肉亦係洋人所售。因土人皆回教也。所用器皿多與中土同。其衣履則詳見初次航海日記。無須再述。惟見女子間有不著蒙鼻形布。

套者其下唇有鍼刺藍點一叢不知何意伊國古字象形今則與中土回民同其數目如 1. 1. 2. 3. 0. 7. 8. 9. 他如 1. 2. 3. 4. 5. 其義未詳其式亦左起橫念與泰西各國同所用銅銀錢亦無孔戊初一刻同段伯爾那威勇隨星使乘車行里許至博洛呢葉家登樓見有上海各商所贈萬名傘二柄如德茂莊德興齋等字號橫幅一條上嵌中外式字四字亦係上洋各商所贈四壁羅列中土東洋陳設頗華美同坐有伊眷屬食味甚佳少談謝別入夜暖

二十二日癸丑晴巳正隨星使乘車答拜博領事遂同
伊往拜本地總管蘇蒂哈喇法其公署頗寬敞式與泰
西同其人先拉手後以手扶頂為禮談次每人各進早
菸一袋加非一杯烟具長五尺黃銅鍋密蠟嘴土奴然
著跪而進之地放銅盤置菸錫于其上少坐辭歸未正
蘇總管來答拜旋有前同船之俄商納斯闊福及美國
領事官白塔臘來拜留飲而去申正持星使名片答拜
納斯闊福伊邀同乘馬車東行二里許至海邊有一方
石柱高七丈五尺周約二十八九尺其底座經苔蘚剝

蝕多有損傷。據土人云。已歷二千餘年矣。去此出城門。
名勒賽達者。復行十餘里。登土岡。有一圓石柱。高八丈。
七尺。周二丈。據土人云。係古時王后名柯柳碧尤塔喇。
者所立。亦二千餘年之物也。看罷分歸。其地城皆土堆。
羅列鐵礮。內外兩門。有濠無水。客人僑寓者。夜間不可
出遊。恐有強盜。故懷戒心。街市乞丐固多。而土人之跣
足。鶉衣者。亦復不少。足見土瘠民貧也。入夜微風涼。
二十三日甲寅晴。午正隨星使來車往得拉羅店。答拜。
白領事申正。一刻偕德威理亞乘車北行二三里。出城。

復行七里許。入一大花園。園名大都。每禮拜與禮拜五
日開。其園甚古。周逾五里。花樹叢雜。豔冶馨香。中一樂
亭頗高。樂工三十二人。紅衣紅帽。所操係西洋樂器。而
音調稍差。四圍鐵柵。木甍行行。男女遊者甚夥。車馬喧
闐。少時樂止。樂工列隊出。登小舟。綠竹復奏。順流而南。
遊人傍岸追隨。半路而別。河不甚寬。長流渺渺。兩岸楊
柳翠色迎人。本地所售點心。有油餅。麪色。麻花。涼粉。炸
糕。及油炸果等類。宛然京都風味。栗子頗大。惟以小鑊
鐵盤燒之而已。土人棺木。係一長匣。窮人持服。只以白

布纏頭其墳塋亦與中土回民同。

二十四日乙卯晴。已初有希臘國領事官扎訥司來拜。其前驅者兵服白袴紅黏金綫靠黑帽上插黑雞翎身佩長刀短劍手舉長槍下連銅刺上置血字形王帽不甚大。是日見鄰鋪有出殯者前舉一十字二玻璃燈後有三神甫誦經棺不著蓋四人以手提環七人著新服以白布交縛其手口含白棉係奉天主教者也。未初時星使名片各拜扎訥司。乘車東北行四里許登其樓頗整潔其人能法語。坐談片時而回。入夜金甌送爽蚊雷

聒人而晝間蠅仍羣舞揮之又來何惱人者之如是多也。

二十五日丙辰晴已初乘車出城至碼頭其繁庶如羊城舟行二里許登法國公司輪船名賽得者式與前在地中海者同頗寬敞長三十二丈寬三丈遙見口內火輪風篷約過百艘岸上樓房鱗比氣象一新勝於二年前所見多多矣午正展輪出口西北行逆風船甚簸揚二十六日丁巳早細雨卯正晴涼浪大於昨晚餐後因見俞惕盦多飲少食尋奉四句云先生一日酒勝我飲

三年惟有加餐勸杯中物可捐。

二十七日戊午晴風息水平船行頗快辰初過甘的島。
希臘國所屬也。長逾百里山頂白雪迷漫終年不化。所
謂銀沙鋪滿三千仞玉纔圍周十二峯者是也。記埃及
人呼一日哇亥二曰他乃恩三曰達拉塔四曰阿拉巴
五曰哈木薩六曰司業達七曰薩瓦八曰他麻呢阿九
曰代薩阿十曰阿沙拉阿十一曰海大什阿拉十二曰
艾他那沙拉十三曰大拉他沙拉十四曰阿拉巴大沙
拉十五曰哈麻斯大沙十六曰賽大沙十七曰薩瓦大

沙十八曰塔麻呢大沙十九曰代薩大沙二十曰阿沙
林三十曰他拉的因四十曰阿拉巴因五十曰哈木三
音六十曰賽的因七十曰薩巴因八十曰達麻呢因九
十曰代薩因百曰米業問好曰那拉克薩伊達今日曰
那哈拉達明日曰白歐克拉昨日曰按比業拉老翁曰
好阿格太太曰賽達是曰艾瓦否曰喇入夜涼生大有
秋風之感

二十八日己未早微陰水深綠色已初晴昨由英邦大
店僱一洋僕名費立克斯者年約二旬係義大利國人

生于埃及能英法語性聰敏一路照料行裝靡不周至
聞埃及回民之棺匣多係檀梨之木甚為堅固葬時傾
亡人于坎內覆之以土將棺帶回以備他人再用為雙
親持服一年亦白色不知中土回民之俗傳自埃及抑
或土民之俗來自他邦皆不得而知也晚餐得食西瓜
甚甘入夜北行稍西順風船始覺速

二十九日庚申晴平早起束裝卯初抵墨西哥住船即
駕小舟登岸路燈未息行人稀少步至倭番斯圭喇的
街武宜呢甲店店不大樓高四層街道狹窄泥濘難行

是島在義大利之西南通名西奚里縱橫皆四百餘里居民十餘萬度數與中土之河南山東同是時雖值隆冬花木吐秀天不雪亦無冰島上多火山山頂大石頻飛火漿迸流田畝頻年受害而居民不肯他徙者因土地膏腴物產豐厚也無如性多懶惰不事工作故貧乏者居半嘗聞西人云義人最美而特嫌其不潔蓋義人不勤潔滌一月始沐浴一次今見其幼女率皆環眼隆鼻粉面烏眉天資甚麗惟破衣赤足殊欠修飾耳申初率費力克斯街遊北面臨河舸艦連檣東北山岡蒼茫

滴翠有一大禮拜堂甚古通身石建名曰喇呢木達布
魯夏達的高約九丈深十九丈寬八九丈入內見男女
跪而誦經者六七中設黃綢幔帳陳設多珍左右白石
古像十八正中十二石柱列為兩行其色青黃如鐵回
店因地近蠶塵湫隘不堪居住乃移于賽力巴喇的街
路北之韋兜亞店院落寬闊樓高五層華麗淨潔見其
搬運行李係以四輪長車二人拽之甚快是日午正有
法國領事官于達來拜

三十日辛酉晴早街遊清風轉蕙爽氣宜人見有驢驛

牛馬負載往來大小與中土同。惟山羊成羣有黃白紫黑四色。蘋果形長而色黃其味如梨。又一果形如雞卵前尖後凹皮有黑點如中土之李瓜有冗刺觸之痛甚洗以熱水其刺自化其色三變先白次綠次黃熟乃紅味甘價亦廉其名未詳。餘有栗椹梨橘等類所需器皿與他國大同小異。惟撲滿一物亦係以泥埴之與中土無殊。未初陰而細雨隨星使乘車答拜于領事行三里始抵其家見其妻子淪茗食果少為周旋而歸其房臨河雲嶺相連高低莫測一路甚涼。

十二月

初一日壬戌自晨至夕時而晴暖時而陰涼時而大雨時而惠風一日之間氣候不齊如此得食白菜波菜茴香萊紅蘿蔔蓂菜芋頭等類聞冬月初一日地中海日蝕遍海皆黑然燈不明竟壞輪船四隻風遂三十餘隻亥初于達來呈其外部派迎中國

欽差之委員由馬賽寄信云請星使即乘所至之船前來馬賽等語伊云此船今夜不來翌午必至是夜檢點行裝初二日癸亥陰涼早發行李于碼頭以待輪船未初本

弄

地官蒲萊來拜。未正晴。此地雖屈冬令。蠅蚊尚多。營
營擾擾。晝夜相尋。申初有土人男女老幼二十餘人來
店。爭看華人。皆能英法語。乃同登樓。步梯四十餘級。至
頂一望。蒼海無涯。窺以千里鏡。遠見濃烟一縷飛來。乃
火輪船也。即辭眾下樓。料理一切。酉初乘馬車行里許。
至碼頭。復駕小舟。行二里。登法國公司輪船。斯夏莽達。
長二十七丈。寬三丈五尺。式與賽得同。係自土耳其國
埔頭走黑海來。此者。船主郭地陽。言語溫和。款待恭敬。
亥初開船。出口甚平。

初三日甲子晴北行稍西遠望東鄙山嶺連綿即義國之西南界也早餐得食一物英名阿的抽其色青芽辦層層似中土之百合又如蓮花座洋人皆以白水煮熟或生食醃以油醋味似茭白入夜極冷風起船搖

初四日乙丑細雨早見東面二島不大一名艾拉巴一名莽代克里斯兜西面大島長二百餘里上鋪白雪下滿綠樹山高故也地屬于法名曰開爾賽夏係前法君拿破侖第一生產之地旁一小島名夏布雷喇臨過時見島上海燈樓出花旗問話船主取書核對其所問者

係願以電綫往馬賽送信否。與乘船者何人。本船亦繫花旗對云願送電信。乘是船者係中國。

欽差等語。入夜船搖大雨如注。

初五日丙寅晴辰初抵法國馬賽海口。住船有前駐中國之法國使臣哥士奇來接。下船乘車行八九里。仍入前二次所住之得露大店。哥士奇去後。查收行李。申初隨星使乘車行里許。至閣朗店。答拜哥士奇。未遇晚有本地二等寶星第四隊副將韋烈及千總傅達義來拜。二人知聶曾來此四次。暢談已往之事。臨行邀同觀劇。

因公務忽忙辭謝。亥初忽聞樓外樂聲一陣出而視之，
共兵百餘名，亂步而行，有唱者，有泣者，有疾驅者，有緩
行者，行人皆擊掌而賀。蓋當時法郎西與德義志兩國
鏖兵數月，其構衅之由，因五十年前西曆一千八百三十
十年即道光十年風怨未平，法君拿破侖第一將日耳曼諸國盡行征服，
令各國兵將聽其指使，以助征討。法雖屢勝歐羅巴各
國，而日耳曼勞兵費餉已屬不支，嗣于西曆一千八百
五十九年即咸豐九年法助義大利及德義志征澳地利亞
國，三國凱旋，議割澳地以弟呢奚米浪二地歸于義國。

德國自取邊界數地。法君以比利時國之陸克尚蒲與瑞士國之芝過瓦二地。界于法疆。擬欲取為已有。以固其圍。而德君不許。此一衅也。德君因此設防繕修甲兵。操練軍馬。屯儲糧糗。細考法邦地理。西歷去年六月間。日斯巴尼亞國老王薨。因其天閹。雖有太子。究非已出。民以為恥。乃欲招選國主。請諸德德君以日斯巴尼亞北界法郎西。遂令其兄子發達利克舍爾登日國主位。意在日後如與法戰。則日主即德人也。法有戒心。不許其事。德國大臣以戰事尚未完備。不可與法較。請姑從。

之德君聽其臣諫其議遂寢法猶恐之乃與法臣計飭
駐德京之法臣貝楠得的者面告德君并與盟之曰嗣
後德國子孫不得登日斯巴尼亞之君位及盟期德君
不答而退乃向法使曰從此兩國無事可為矣法使以
其語飛聞于拿破侖德義志原名布魯斯乃由是合日耳曼
諸國為一以圖協力攻法西曆七月十七日法外部大
臣萬孟請與德戰即日發電綫知照法國之各省軍營
剋期發兵兩國各撤回公使各發照會通報歐羅巴暨
阿美利加諸國宣告兩國不日交戰與諸國無涉各不

借助云。法君與其世子親領大軍。令兵部大臣婁白虎
 為前導。先抵美趾省。晝夜輪車往來各省。徵調軍馬。至
 八月初二日始齊。共兵二十四萬。當日午初。法兵過界。
 至色合柏爾城。遂失守。初四日。法三營將軍屠威領兵
 攻葦子柏爾城。大敗。全軍幾歿。惟屠威一人匹馬獨戰。
 痛受槍傷。後有將軍馬克謀宏兵至。救回色合柏爾城。
 初六日。德兵過法界。有將軍富斯愛率兵抵敵。法復敗。
 遂同馬克謀宏逃過海素汾城。至直立唐奚城外。禮拜
 堂中隱避。此役歿于陣者。將官二員。兵馬死者。不計其

數初七日德兵三萬圍色合柏爾城擒法兵三千克復城池初九日婁白虎戰亡令歸白生富斯愛馬克謀宏各營兵馬齊集美趾初十日法京出示通城預備火器多進糧草嚴兵固守城上添造木房城外各礮台添設大礮以壯聲威十一日馬克謀宏在葛合曉地方與德戰敗十三日德圍斯達泗浦城城內兵一萬勇四萬被困五十日晝夜進攻法軍陣亡大半房屋平毀無數連日槍礮火飛如雨人皆藏入地洞後因鐵道不通援兵不至餉糈告乏遂皆納款于德十五日德軍一面進攻

直立唐奚一面合圍美趾。直立唐奚失守。法君攜其世子逃至葦河洞城。白生率軍出美趾城與德決一死戰。自晝至夜。德雖傷兵四萬。法仍不能取勝。乃退入守城。內外礮台堅固。兵九萬。勇七萬。槍礮大藥足供一年之需。德軍圍至七十日。環垣高築土城。以大礮俯攻。二十八次。後以城中糧盡。遂乞降焉。十六日。法君退至舍隆。因各處電綫鐵路皆為德軍拆毀。援救罔應。二十五日。欲去舍隆走水塘。乃部署未定。而德軍四進矣。九月初一日。圍攻舍隆。法兵復敗。馬克謀宏創傷甚重。初二日。

法德大戰于水塘城。七晝夜。互有勝負。是役也。德軍六十萬。用槍礮百二十萬。至是俘虜法軍三十五萬。奪獲大礮四千七百門。槍三十萬桿。踞地二省。至初六日。法君欲與德議和。德君不允。當日午刻。法君手舉免戰白旗。欲見德君。乃先遣一官。往送寶劍。以示相投之意。德君答云。不能與劍對語。即欲議和。可令拿破侖自來。未初。法君親詣德營。德帥畢馬與其大將何楠暗約。調軍三十萬。乘間竊發。與法軍八萬。復大戰于水塘城。法旋敗績。拿破侖遂被俘焉。城池官員兵卒。皆歸于德。初

七日巴里聞各處失守國君被俘眾議改為民政遂于是日擬定各官巴里提督代理營務所選各部如吏部亢貝得戶部皮格禮部席孟兵部傅羅刑部柯梅工部唐安海部富立松商部馬年外部發福爾外以岡北達為帥內以屠額許操兵而民主執國政焉君后問眾可仍居巴里否眾云不可遂攜世子逃往比利時尋又入英吉利初八日巴里查點各營軍器計存槍三萬桿而火藥皆係沙土十五日派員往英乞代議和英乃告德德除索法三省地兵船一半及各營軍器外須賠償兵

餉數十萬磅。合銀八千四百萬兩。英俄澳諸國同議無
法。十八日。德因巴里拆毀鐵道電線。音信不通。發福爾
親入德營。問其前言能改否。畢駟馬言不能改。乃歸。後
又求德免戰數日。因此時巴里民選會堂大臣畢駟馬
先要法于邊界大礮台二。巴里大礮台一。德兵被俘者
釋還。并償銀八千四百萬兩。法不能從其議。于是西南
北三面憤起義兵。二十二日。在巴里東礮台大戰。法勝。
次日又戰。法亦勝。德共傷兵萬餘。失大礮數門。噴礮十
二門。旋戰于北礮台。法又勝。德軍退往衛灑與三克路。

二舊王宮。日夜築土礮台以攻巴里。二十四日。義大利國因見法敗。乘勢進兵于羅馬。逐出天主教皇。以羅馬為都。蓋法君后係天主教。而教皇多賴其勢以轄人也。後借公論。令其移住瓦的甘城。而盡銷其權。二十五日。法東鄉兵來援巴里。遇德兵戰。德敗。時巴里儲備糧糗足供三月之需。城外大小礮台二十三座。計礮八百零八門。城上計礮一千二百門。沿濠戰艘十數隻。各處理伏地雷火。礮官兵二十萬。鄉勇四十萬。每日出城引戰。德不得入。三十日夜半。法兵四面出城。搥德兵地勢。于

南礮台外二十里遇德兵戰德敗退入村堡法兵追入步戰彼此傷兵數千法奪回二村十月初九日有戴紅帽之鄉勇十萬名為紅頭者齊赴外部偽以擊退德兵為名欲藉改民政而作亂遂調各部兵將擊退之自十月初至十五日各礮台日夜轟擊德土礮台數座而德兵移營漸遠矣官出告示云凡鋪出售皆依官價不得多賣如麪包每斤三絲半牛肉每斤一方零一絲羊肉每斤一方豬肉每斤一方四絲此數日內凡窮人無依者准其入城逃避而收養之德兵退皆放還十三日法

京東南四路出兵與德戰。德敗，又奪回二村。西礮台放
大火彈，自焚三克路鎮與舊王宮。德兵退十八日。德兵
五千至石頭洞村，村人與之戰，乃于道口築起土城，以
阻德兵歸路。德放噴礮，房樓盡毀。德傷兵一千八百，乃
退。法亦被傷數百，官賞洋圓一萬二千，以褒其忠勇云。
二十一日，有將軍瞿克歐者，率兵十一萬，帶礮九十二
門，分左右中三營出城，探德兵地勢。其中營往阿候驛，
麻爾梅松各村引戰。自未至戌，彼此大礮噴礮，連放不
止。法大捷，後遇德救兵至，不得前進，乃各行緩退。法失

礮二門，傷兵四百四十三名。德陣亡者二千四百名。其左營阻德過河，德乃自造木橋而渡之。不意馬隊過時，而西礮台連放二礮，擊壞木橋，兵皆落于水矣。各土礮台亦連放數百礮，而將軍白朗土者追獲德兵一百四十名。其右營將軍韋努阿者與德戰于三克路茂洞，賽佛比陽暨古皇河邊，無分勝負。日暮罷兵，各自守營。此時巴里城內集捐鑄礮五百門，各家儉用，每日兩茶一飯，一人只准買肉四兩。其餘豬鴨雞魚及乾鮮菜蔬皆無，雞蛋每箇六絲。各村鎮禮拜堂之銅鐵器皿皆取以

鑄礮城內造鐵道以運軍器二十九日旦初法東北方
隊長貝喇嘛遣兵急走蒲日村暗襲德營遂入村據守
各要路築木柵四面立土礮台午正德伏兵掩至法兵
將牆垣穿孔槍礮齊施德兵漸退至東北大礮台又被
轟擊而退午後德又來兵二萬五千帶礮數十門連攻
一夜德仍未勝而去此村距巴里十二里屍填溝壑血
滿田疇當時德兵在巴里城外四圍築大礮台下開深
溝為礮子所不及各樹林中亦築礮台掘大洞兵藏于
內德共來大銅礮數十門重皆十萬斤長一丈六尺銅

礮子長一尺，重千斤，開花子重九百九十八斤，圓子重九百六十斤，內含火藥十四斤，錫礮子重一百九十六斤，礮車用六輪，大盤重二萬四千斤，共值銀六萬五千二百五十兩，大礮每門值銀四萬六千二百五十兩，每放一次，火藥礮子值銀三百八十四兩，開花子每次用藥二百八十八斤，近因火道電線皆被德兵拆毀，巴里乃以輕氣燈四外寄信，三十日，德兵三萬帶礮三十門，由古南寺分路下山，復得蒲日村，法兵被俘者四千名，三十一日，法外部通告英俄澳義四國，乞代議和，即日

派員赴德營乞暫停兵以便選舉各省會堂官畢駟馬
未允午後有紅頭數萬圍守提督公署聲言要改紅頭
民政廷臣集議示以翌日宣告須通城人民保結再為
酌定十一月初三日巴里百姓保者五百五十萬七千
九百九十六名不保者六萬二千六百三十八名改否
未定是日前往四國之員各同使臣奉命而往德營會
議一為法國選舉各省會堂大官以立民主之邦一為
巴里辦糧一為免戰二十五日以爲議和之地步德君
與畢駟馬駁云法京糧糗告乏不能久敵待其詳潰自

然乞降。又有紅頭作亂。其敗可翹足而俟也。初九日。四國使臣因議未果。乃請護照而行。未幾而南方之兵與德鏖戰于螯立陽城矣。德兵被俘者二千餘名。失大礮二門。火藥二十餘箱。輜重馬匹無算。德兵逼近巴里。繼此又各傷二千餘名。此時巴里城四面與各礮台施放火器。晝夜戒嚴。十四日。南城外法兵退。德兵折回克河。堆善皮呢二村。工部親點軍器。刻即製造大礮一千五百。噴礮五十。炸礮子二百五十。其餘鉛丸火藥。稱之又令將牛馬驢驘。猫犬鵠鵲。納官分賣。有定價。不論貧富。

每人一兩五錢持牌領肉而車無代步矣。又兵部出示招兵無論何人其有妻無子者自二十五歲至三十五歲入隊有妻有子者登埤守礮無妻子者二十一歲至四十五歲皆出戰其十七歲至二十歲願者亦可入營。此時共兵六十萬大礮三千五百門二十九三十兩日東南戰勝敗無分十二月初二日法兵連奪五村擒德官四員兵八百二十名大礮四門槍無數法兵死者九百三十六名傷者四千六百八十七名武官傷者三百四十二死者七十二德之傷亡者一萬有奇因此免戰。

六日，以便殮埋。此次血戰，地周五十餘里，死屍枕藉，慘目傷心。嗣因德兵阻路，法兵只得退入巴里，以謀再舉。二十一日，法兵出城東北交戰，自辰至酉，奪回六村。德兵被俘者百餘名。二十二日，德兵折回轉戰，勇倍於前。法力不支而退入城矣。失兵六百餘名，傷亡者千餘名。是日巴里西南教的洪城失守，傷亡各二萬有奇。而法兵被俘者一萬二千，十餘日來外省連戰，法又失二省。四府法共三十三省，自初戰迄今，計失五省四府數村。二十八日，法兵戰于巴里東南狄仁省，德敗退入五昌。

府法兵追至奪回五昌德乃西退得援而止繼又戰于
巴里北美梅府德敗傷兵七十退入南岬武官柯立尚
追至德旋小捷而陣亡二千餘名內王一將軍二法之
傷亡者相埒又戰于巴里南法敗德王發達力克舍爾
受傷又巴里正東每日小戰法兵東進以斷德之回路
三十一日巴里東之荷泥花溪努尚三礮台俱被德兵
轟陷德又築土礮台十二放銅礮八十門其力可及三
十里法兵連日仰攻未能得力本年正月初六日城外
西南山頂德築大礮台十二放大銅礮一百二十門晝

夜齊發以攻礮台與城兼放開花礮五六千于城內大半落于思安江之南岸擊死養濟院中之病人無數又一礮子落于女學院幼女傷者六死者五其血肉飛黏四壁慘不忍言又轟天主堂數座傷死男女老幼數十名又燒毀樓房數處大花園火樹銀花牲靈園禽驚獸駭誠為未有之浩劫也按萬國公法應于未攻之前二日宣戰以便准備一切今德未先通報遽行火攻殊屬有背公法故法外部照會歐羅巴及阿美里加各國聽其公論十五日巴里出示每人只許喫麪包四兩德兵

至此，已圍困一百三十三日。城內糧糗告乏，又因紅頭反間，幾有譁潰之虞。加以每日房宇崩壞，死傷相繼，雖各省救援，亦皆敗走。眾議決一死戰，以圖保全。于萬一亦不得已之舉也。又巴里東北之山泥城，被攻五晝夜，每日礮子落于城內者，已積如山。二十一日，巴里城內各營出戰，自辰至酉，敗績回城。兵多逸去者，二十五日，即華十二月初五日，因巴里城內有一百八十萬之眾，而糧糗不足半月。廷臣集議，欲往德營乞和，擬停戰二十一日，以便運糧。訂于明日，外部大臣前往決議。